

Date – 20/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n mihring hi awm reng mah se hnam ziate a bo si chuan hnam a bo a ni, a ti.
2. Home Minister Pu K. Sapdanga'n ram leh hnam dam lohna pakhat chu rinawmna hloh a ni thin, a ti
3. Kashmir-ah a vawi khat nan vawiin hian Srinagar-ah mega international marathon neih a ni dawn.

<><><>

HNAM LAM INTIHSIAK

Art & Culture Department leh Central YMA te tangkawpin an buatsaih Chief Minister's Running Trophy vawi 13-na, Hnam Lam Intihsiak chu nimin khan Aizawl Dawrpui Multipurpose Centre-ah khar a ni a. Chief Minister Pu Lalduhoma'n a hmanpui.

Chief Minister chuan mihring hi awm reng mah se hnam ziate a bo si chuan hnam a bo a ni, a ti a. Mizo te tihdan tha tinrengte chu chhawm nun zela zahpui tur a ni lo, a ti a. Kristiannaah hian Seki leh Tingtangte nena Pathian fak te hi Pathian thu nen pawh a inrem thlap a, kristianna leh Mizo culture hi rem takin a kal dun thei tih a sawi a ni.

Art & Culture Minister Pu C. Lalsawivunga pawhin he hunah hian thu sawiin, hnam changkangten hmasawmna leh an hnamzia an kal kawptir thiam a, hmasawmna ke pen nghet an nei thin a, Kristianna leh hnam ze thate keng tlat chungin hma a sawn tur a ni a, chu chu hmasawmna dik chu a ni a, hnam zia ngaih hlut tlat a tul a ni, a ti.

Chief Minister's Running Trophy vawi 13 na - Hnam Lam Intihsiak-ah hian Branch YMA 42 te Khuallam leh Cheraw ah an inel a. A pumpuiah Pakhatna Chanmari West Branch YMA an ni a, pahnihna Vaivakawn Branch YMA an ni.

Cheraw-ah pakhatna Chanmari West Branch YMA, pahnihna Lamka Branch YMA leh pathumna Ramthar Branch YMA te an ni a

Khuallamah hian pakhatna Vaivakawn Branch YMA, pahnihna Chanmari West Branch YMA leh pathumna Pawlrang Branch YMA an ni.

<><><>

HOME MINISTER

Home Minister Pu K.Sapdanga'n sorkarna an chelh hnuin Home Department-ah tan an la nasa hle a, kalphung hluia hun rei tak a lo kal tawh avangin department chhungah siam that ngai thil tam tak awmin, an insiam rem mek a ni, a ti.

Mi rinawm leh fel tak tak karah mi inthlahdahte avangin an lo hming that tawhna te pawh thai rehin a awm phah thin tih sawiin Home Minister chuan heng mi inthlahdah, mi rinawm lo te hi sorkar chuan a thian thianglim nual tawh a, an chungah thununna an lek zel dawn a ti.

Nimina Tuirial Assembly bial chhunga khaw thenkhat a tlawhnaah he thu hi sawiin Pu K. Sapdanga chuan ram leh hnam dam lohna pakhat chu rinawmna hloh a ni thin a ti a. Tunhma chuan zofate chu hnam rinawm, kawngka kalhna atan pawha thingfak hmang mai thin an ni a, khawvel hmasawmna leh changkannain a luh chhuah hnu hian sorkar pisa-ah te, ram enkawlina kawngahte, khawtlang inrel bawlinaah te, mahni hna zawn theuhah te rinawmnain hmun a chang tlem ta hle a, tan lak a ngai ta hle a ni, a ti.

Home Minister chuan Ruihhlo avangin ram a rum mek a, chhungkaw tamtak an tap a, thalaite nunna pawh a hek hle a, Mizoram hi ruihhlo tawlhna kawngpui pakhat a ni a, hei hi sorkar thar chuan a ngaimawh tak zet a, Central YMA pawhin theih tawp chhuahin ruihlo do kawngah hma a la mek a ni a ti. Sorkarin a chhinchhiah bikah, kumin chhunga ruihhlo man ringawt pawh cheng vaibelchhe 160 chuang hu a nih tawh thu leh hetiang zela Mizo thalai, a bikin Mizo mipate ruihhlo bawiha an tan chhoh chuan hnam chu a ral zawngin a kal zel ang tih a hlauhawnawm hle a, tlawmngai pawlte, Kohhran leh Kohhran thalaite, tumah inthlahdah lova tangho zel turin a ngen a ni.

<><><>

AR REBUTTAL

Power & Electricity Minister Pu F Rodingliana, Assam Rifles ten hmun hrang hranga an checkpost-a tihdin a nih chungchang chhangin Assam Rifles chuan Minister leh a hote chu an tihdin ni lovin anmahni thua ding an ni an ti a, he thil thlen hnuah Mizoram hmun hrang hranga Assam Rifles te awmnaa power supply tihtawp chuan venhimna lama an hnathawh a tikhaihlak thei a, power supply pe leh thuai turin thuneitute an ngen tih an sawi.

Assam Rifles hian he thilthleng chungchang chhanna hi nimin khan tichhuakin, ni 17 khan ralthuam phur an awm thu intelligence report an dawn hnuah Zokhawsangah Mobile Vehicle Check Post an siam a, helai paltlangtu Pu F Rodingliana leh amah zuitu lirthei 4 chu kaltlangtir phalsak an ni a, amaherawhchu anmahni zawk hi an ding a, helai thil thleng video-a a lan dan angin, Minister PS pawh a inhrosaa, sipai camera te pawh a chhuhsak a, hemi hnu lawka Assam Rifles te power supply tihtawp pawh hi tihluh a ni ngeia hriat a ni, an ti.

Tun thla ni 12-a Kawlbem a thilthleng chungchang sawiin Assam Rifles chuan, Minister leh a hote hi Assam Rifles checkgate-ah hian dingin an check post chu thiat turin an ti a, heta an inbah buainaa sipai zurui nia sawi chu a sakhuana avanga zu in ngai lo leh kum 20 a hnathawh chhunga mi entawntlak a ni, an ti a, he sipai hi khaw dangah hruai luiin Assam Rifles Commander a inrawlh hnuah chhuah a ni leh chauh a ni an ti bawk.

Hetihlai hian, Power Minister Pu F Rodingliana chuan ni 12 khan a bial fang chu Kawlbem daiah Assam Rifles sipai pathumin lo tidingin kaltlang an phal lova, a tidingtu chuan zu a ruih thu a sawi a, churang chuan thu zawhfiah turin police-in an la a, sipai pawh chu case engmah siam loin Police-te'n an chhuah leh a ni a ti a.

Ngopa-a an Company Commander chu thil awmzia sawiho turin Civil SDO-in
ziakin sawm mah se an rawn kal loh thu a sawi bawk.

Hemi chungchanga kan Correspondent Report lo ngaithla ang.

<><><>

FISHERIES

Saitual District Fisheries Department chuan Saitual District huam chung
luidunga nungcha humhalh kawnga Central YMA nen inremna an siam bawhzuiin
nimin khan Sub-Head quarters Joint YMA ten Tuivawl Phullen kai an humhalhna
hmunah Closed Season Awareness hun an hmang.

Closed Season hun chhung hian luia sangha leh nungchate man, tihlum, an
chenna leh nunphung tihbuai khap a ni.

DFDO Pi Zomuansangi chuan he Closed Season chhunga sangha inthlahpun
hunlaia venhim an nih hian a lehpek zel atan sangha man tur an pun phah tih a sawi
a, Closed Season puan chhung chuan mi tinte insum hram hram turin a chah nghal a
ni.

<><><>

KASHMIR VALLEY

Kashmir-ah a vawi khat nan vawiin hian Srinagar-ah mega international
marathon neih a ni dawn.

Marathon-ah hian infiammi 2000 an tel dawn a, heng zingah hian ram pawn
athlete 59 an tel dawn a ni. Infiammi te hian km 42 full marathon leh km 21 half
marathon an tlan dawn a ni. Srinagar-a press conference-ah thu sawiin Director
Tourism J&K, Raja Yaqoob Farooq chuan a vawi khat nan marathon-ah hian
registration 2000 chuang an awm tawh tih sawiin, State leh Union Territory 29 leh
ram 13 atangin palai an dawng tawh tih a sawi. Kashmir Marathon hian Kashmir chu
international event buatsaih turin a inpeih tawh tih a lantir thu a sawi bawk.

<><><>